



OV OBERBURG

Obfrouebriicht Abteilig Gflügu 2021

HV 2022

Mir luege einisch, was ig überhoupt cha scribe zu däm gäng no schwierige Corona Jahr 2021. Aber egau, Tierli gä so oder so Arbeit. D Züchter hei gsorget für schöni Stämmli zäme ds steue für de Eier ds sammle, wo si säuber i d Bruetmaschine gleit hei. Oder wie gäng, se üsem Bruetmeister em Hanspeter hei bracht. Dr Hanspeter het füre OV Oberburg 425 Stück inegleit u es si 216 Bibeli gschlüpft, das si 50.82%. Für uswärtigi Züchter het er 240 Stück dörfe inelege, do drvo si 112 Bibeli gschlüpt, das si 46.66%. Danke Hämpu.

Im Mai hani 145 Ringli bschteut.

Am Samschti dr 14. Ougschte isch e Infoalass vo Rassegflügu Schweiz bim Markus Grüter uf dr Strussefarm in Sempach dürefgüehrt worde. Dr Urs Baumberger und ig si go inelose. Es isch e intressante Namittag gsi. D Tagesleitig het dr Christian Lengacher gha und är het über die neuschte BLV Vorgabe informiert.

Am 11. Septämber het d Delegierteversammlung in Lützuflüeh stattfunge. D Abteilig Gflügu isch im Vereinshuus KTF Brandis gsi. Dr Hansruedi Schaffer het dörfe d Verdiensturkunde entgäe näh. Härzlechi Gratulation. Dr Hanspeter und i hei ne begleitet.

Am 19. Septämber isch ds Oberburg dr Züchterbsuech dürefgüehrt worde, do drzue hei mir dr OV Hasubärg iglade. Es isch e chaute u rägnerrische Sunntig gsi. Gflügu heimer nume grad bi Schaffers agluegt, schöni Wyandotte u Welsumer. Aschliessend het me bi Lüthis im Zäut brätlet. Mir si doch 40 Persone gsi. Aune wo mitghulfe hei danke viumau. Es isch ganz e tolle Sunntig gsi.

Am 31. Oktober heimer üsi Vorbewärtig chönne dürefüehre. Natürlech gäng no mit Maske, Abschtang u Iteilig vo de Züchter. Dr Hanspeter Schürch u dr Jürg Vogel hei zäme 80 Tier i d Häng gno. Danke am Hansruedi Bolzli für das mir hei dörfe d Wärchstatt bruche.

I ha no Amäudige notiert für Schwarzenburg u die Ämmitalischi in Schüpbach. Aschliessend hei mir bi Willeners Zmittag gässe u e gmüetleche Namittag zäme verbrunge. Danke Fränzi u Sepp.

De heimer doch no 2 Usschtellige dörfe ha. Am 8./9. Januar 2022 in Schwarzenburg. Dr Hanspeter u dr Sepp si mit emne Güggu gange. U de vom 21.-23. Januar 2022 isch no die Ämmitalischi LTVE in Schüpbach dürefgüehrt worde. Dr OV Oberburg isch mit em Gflügu uf e 4. Rang cho.

U de isch das Jahr 2021/2022 o scho wieder düre. Ig wünsche aune e gsungi u gueti Zyt u viu Gfröits i Huus, Hof u Stall.

Öii Obfrou Ruth Lüthi